



აფხაზეთის ავტონომიური რესპუბლიკის უმაღლესი საბჭოს
თავმჯდომარის

ბ რ ძ ა ნ ე ბ ა № 01/19

“ 05 ” “ 07 ” 2019 წელი

აფხაზეთის ავტონომიური რესპუბლიკის უმაღლესი საბჭოს
საკონსტიტუციო და ადამიანის უფლებათა დაცვის კომისიის აპარატის
დებულების დამტკიცების შესახებ

აფხაზეთის ავტონომიური რესპუბლიკის უმაღლესი საბჭოს რეგლამენტის 56-ე
მუხლის „ჟ“ ქვეპუნქტისა და 154-ე მუხლის მე-3 პუნქტის საფუძველზე ვბრძანებ:

1. დამტკიცდეს აფხაზეთის ავტონომიური რესპუბლიკის უმაღლესი საბჭოს
საკონსტიტუციო და ადამიანის უფლებათა დაცვის კომისიის აპარატის დებულება
(დანართი N1);
2. ბრძანება ძალაშია 2019 წლის 6 აგვისტოდან.
3. ბრძანება შეიძლება გასაჩივრდეს სოხუმისა და გაგრა-გუდაუთის რაიონულ
სასამართლოში (ა.კალანდაძის ქ. N7ა) ერთი თვის ვადაში.

უმაღლესი საბჭოს თავმჯდომარე

ჯემალ გამახარია

დანართი N 1

„დამტკიცებულია“

აფხაზეთის ავტონომიური რესპუბლიკის უმაღლესი საბჭოს

თავმჯდომარის 2019 წლის „05.07“ N 01/19 ბრძანებით

**აფხაზეთის ავტონომიური რესპუბლიკის უმაღლესი საბჭოს
საკონსტიტუციო და ადამიანის უფლებათა დაცვის კომისიის აპარატის**

დ ე ბ უ ლ ე ბ ა

თავი I

ზოგადი დებულებები

მუხლი 1.

1. აფხაზეთის ავტონომიური რესპუბლიკის უმაღლესი საბჭოს საკონსტიტუციო და ადამიანის უფლებათა დაცვის კომისიის (შემდგომში კომისიის) აპარატი არის უმაღლესი საბჭოს აპარატის მუდმივმოქმედი სტრუქტურული ერთეული.
2. კომისიის აპარატი თავის საქმიანობას ახორციელებს საქართველოს კონსტიტუციის, „საჯარო სამსახურის შესახებ“ საქართველოს კანონის, უმაღლესი საბჭოს რეგლამენტის, უმაღლესი საბჭოს აპარატის დებულების, კომისიის დებულებისა და ამ დებულების შესაბამისად.

თავი II

**კომისიის აპარატის ძირითადი ამოცანები,
ფუნქციები და უფლებები**

მუხლი 2.

კომისიის აპარატის ძირითადი ამოცანებია კომისიის წევრებისა და კომისიაში შექმნილი სამუშაო ჯგუფების კანონშემოქმედებითი და ორგანიზაციული საქმიანობის სამართლებრივი, დოკუმენტური, საინფორმაციო, ანალიტიკური და ორგანიზაციულ-ტექნიკური უზრუნველყოფა, კომისიის საკონტროლო საქმიანობის ხელის შეწყობა.

მუხლი 3.

კომისიის აპარატი:

- ა) მონაწილეობს კანონპროექტების, უმაღლესი საბჭოს დადგენილებების, სხვა გადაწყვეტილებების პროექტების, კომისიის გადაწყვეტილებების პროექტების, სამუშაო გეგმის შემუშავებაში, კანონპროექტებზე დასკვნების, შენიშვნებისა და წინადადებების მომზადებაში, კომისიის საკონტროლო, ორგანიზაციულ და სამუშაო გეგმით გათვალისწინებულ სხვა საქმიანობაში;
- ბ) კომისიის დებულებით გათვალისწინებულ საქმიანობასთან დაკავშირებით ახორციელებს საკონსულტაციო და ანალიტიკურ ფუნქციებს, ორგანიზაციულ-ტექნიკურ მომსახურებასა და საქმისწარმოებას;
- გ) ორგანიზებას უწევს კომისიაში მოქალაქეთა მიღებას, კომისიის წევრებთან ერთად განიხილავს მოქალაქეთა წერილებს, საჩივრებსა და განცხადებებს, აგრეთვე კომისიაში შესულ სხვა კორესპონდენციას;
- დ) კომისიის სხდომაზე განსახილველად ამზადებს სათანადო დასკვნებს, წინადადებებს, ცნობებსა და ინფორმაციას;
- ე) ორგანიზებას უწევს კომისიის სხდომების, საკომისიო მოსმენების, კომისიაში სამუშაო/საკონსულტაციო თათბირებისა და საქმიანი შეხვედრების მომზადებას, უზრუნველყოფს მათი მსვლელობის დადგენილი წესით დაფიქსირებას და მიღებული გადაწყვეტილებების საოქმო გაფორმებას;
- ვ) თავისი კომპეტენციის ფარგლებში თანამშრომლობს უმაღლესი საბჭოს აპარატის სხვა სტრუქტურულ ერთეულებთან, აგრეთვე კომისიის საქმიანობის სფეროსთან დაკავშირებულ აფხაზეთის ავტონომიური რესპუბლიკის აღმასრულებელ ხელისუფლების დაწესებულებებთან, ორგანიზაციებთან, ფიზიკურ და იურიდიულ პირებთან.
- ზ) წარმართავს კომისიის საქმისწარმოებას, ამზადებს, აღრიცხავს, დადგენილი წესით ანაწილებს და აგზავნის კომისიაში შემოსულ და კომისიიდან გასულ კორესპონდენციას, უზრუნველყოფს საიდუმლოობის რეჟიმის დაცვას;
- თ) ასრულებს საქართველოს კანონმდებლობით, აფხაზეთის ავტონომიური რესპუბლიკის კანონმდებლობით, უმაღლესი საბჭოს აპარატის დებულებით და ამ დებულებით განსაზღვრულ სხვა ფუნქციებს;
- ი) აღწესდებს ოკუპირებულ ტერიტორიებზე ადამიანის უფლებათა დარღვევების ფაქტებს და ახდენს შესაბამის რეაგირებას.

მუხლი 4.

კომისიის აპარატს თავისი კომპეტენციის ფარგლებში, საკუთარი ფუნქციების შესრულების მიზნით, უფლება აქვს:

- ა) კომისიის საქმიანობის სფეროსთან დაკავშირებული აფხაზეთის ავტონომიური რესპუბლიკის აღმასრულებელი ხელისუფლების დაწესებულებებიდან, ორგანიზაციებიდან კანონმდებლობით დადგენილი წესით გამოითხოვოს და მიიღოს ინფორმაცია;
- ბ) კომისიის საქმიანობის ძირითადი მიმართულებების შესაბამისად შექმნას სამუშაო ჯგუფები კომისიის აპარატის მოხელეების, შრომითი ხელშეკრულებებით მოწვეული

სპეციალისტებისა და მეცნიერ-მუშაკების, აგრეთვე კომისიის აპარატის სტაჟიორების მონაწილეობით;

გ) კომისიის დავალებით, დადგენილი წესით მონაწილეობა მიიღოს ხელშეკრულების საფუძველზე შესაბამისი დარგის სპეციალისტების მოწვევაში;

დ) საქართველოს კანონმდებლობით დადგენილი წესით ორგანიზება გაუწიოს კომისიის აპარატის მოხელეთა მივლინებებს.

თავი III კომისიის აპარატის შემადგენლობა და მართვა

მუხლი 5.

1. კომისიის აპარატის შემადგენლობაში შედიან სამტატო განრიგით გათვალისწინებული საჯარო მოსამსახურეები.

2. კომისიის აპარატის სტრუქტურასა და სამტატო ერთეულების რაოდენობას კომისიის თავმჯდომარის წარდგინებით და უმაღლესი საბჭოს აპარატის უფროსთან შეთანხმებით ამტკიცებს უმაღლესი საბჭოს თავმჯდომარე.

3. კომისიის აპარატის საჯარო მოსამსახურეებს (გარდა კომისიის აპარატის უფროსისა) თანამდებობაზე ნიშნავს და თანამდებობიდან ათავისუფლებს აფხაზეთის უმაღლესი საბჭოს აპარატის უფროსი.

4. კომისიის აპარატის უფროსს თანამდებობაზე ნიშნავს და თანამდებობიდან ათავისუფლებს უმაღლესი საბჭოს თავმჯდომარე.

5. კომისიის აპარატის საჯარო მოსამსახურეებია:

ა) აპარატის უფროსი;

ბ) უფროსი სპეციალისტი;

გ) კომისიის თავმჯდომარის თანაშემწე.

6. კომისიის აპარატის მოხელეთა საკვალიფიკაციო მოთხოვნები და უფლება-მოვალეობები განისაზღვრება შესაბამისი სამუშაო აღწერილობებით. კომისიის აპარატის თანამშრომლები არიან საჯარო მოსამსახურეები, რომლებიც ახორციელებენ კანონმდებლობით, უმაღლესი საბჭოს აპარატის დებულებით, კომისიის დებულებით, ამ დებულებითა და სამუშაო აღწერილობით მათზე დაკისრებული ამოცანების შესრულებას.

მუხლი 6.

კომისიის აპარატის უფროსი:

- ა) კომისიის თავმჯდომარესთან ერთად ახორციელებს კომისიის აპარატის საერთო ხელმძღვანელობას, კომისიის აპარატის საჯარო მოსამსახურეებს უნაწილებს ფუნქციებსა და დავალებებს, პასუხს აგებს კომისიის აპარატის მიერ ძირითადი ამოცანებისა და მოვალეობების შესრულებისათვის;
- ბ) ორგანიზებას უწევს კომისიის სხდომების მომზადებას, მიღებულ გადაწყვეტილებათა და სხდომების ოქმების დადგენილი წესით გაფორმებას;
- გ) კოორდინაციას უწევს კომისიის აპარატის და უმაღლესი საბჭოს აპარატის სხვა სტრუქტურული ერთეულების ურთიერთობებს;
- დ) უზრუნველყოფს კომისიის აპარატის საჯარო მოსამსახურეთა შრომის დისციპლინის დაცვას, ამზადებს წინადადებებს მათი წახალისებისა და დისციპლინური პასუხისმგებლობის თაობაზე;
- ე) ასრულებს კანონმდებლობით, უმაღლესი საბჭოს აპარატის დებულებით, კომისიის დებულებითა და ამ დებულებით განსაზღვრულ სხვა ფუნქციებს.
- ვ) კომისიის აპარატის სახელით პასუხს აგებს კომისიის მიერ უმაღლესი საბჭოს სხდომებზე განსახილველად გატანილ კანონპროექტებზე, აღნუსხავს უმაღლესი საბჭოს პლენარულ სხდომებზე კანონპროექტების განხილვისას გამოთქმულ შენიშვნებსა და წინადადებებს;
- ზ) კოორდინაციას უწევს კომისიის აპარატის კანონშემოქმედებით, კვლევით, ინფორმაციულ და ანალიტიკურ საქმიანობას.

მუხლი 7.

უფროსი სპეციალისტი:

- ა) ახორციელებს კომისიის კანონშემოქმედებითი საქმიანობის სამართლებრივ მომსახურებას;
- ბ) მონაწილეობს კანონპროექტების, უმაღლესი საბჭოს დადგენილებებისა და სხვა გადაწყვეტილებათა პროექტების, კომისიის გადაწყვეტილებათა პროექტების შემუშავებაში, ანალიზსა და განზოგადებაში;
- გ) მონაწილეობას იღებს კანონპროექტების დახვეწას იურიდიული ტექნიკის თვალსაზრისით;
- დ) ამზადებს დასკვნების პროექტებს კომისიაში განსახილველად შესულ კანონპროექტებზე;
- ე) ახორციელებს კომისიის საქმისწარმოებას;
- ვ) კომისიის აპარატის უფროსის არყოფნის პერიოდში ახორციელებს მის თანამდებობრივ უფლებამოსილებას;
- ზ) პასუხს აგებს კომისიის კომპეტენციისათვის მიკუთვნებულ საკითხებზე საიდუმლოების დაცვისა და თანამდებობრივ მოვალეობათა სრული მოცულობით, კვალიფიციურად შესრულებისათვის;
- თ) ასრულებს კომისიის თავმჯდომარისა და კომისიის აპარატის უფროსის სხვა დავალებებს;
- ი) აღნუსხავს ოკუპირებულ ტერიტორიებზე ადამიანის უფლებათა დარღვევების ფაქტებს და ახდენს შესაბამის რეაგირებას.

მუხლი 8

კომისიის თავმჯდომარის თანაშემწე:

- ა) ახორციელებს კომისიის თავმჯდომარის კანონშემოქმედებითი საქმიანობის ორგანიზაციულ-ტექნიკურ მომსახურებას;
- ბ) მონაწილეობს კანონპროექტების შემუშავებასთან დაკავშირებით ექსპერტების მოწვევასა და მათთან დიალოგში, კომისიის სხდომების ჩატარებასა და დელეგაციების მიღების ორგანიზაციულ ღონისძიებებში;
- გ) ასრულებს კომისიის თავმჯდომარის დავალებებს;
- დ) პასუხს აგებს კომისიის კომპეტენციისათვის მიკუთვნებულ საკითხებზე საიდუმლოების დაცვისა და თანამდებობრივ მოვალეობათა სრული მოცულობით, კვალიფიციურად შესრულებისათვის.

თავი IV

დასკვნითი დებულებები

მუხლი 9

1. კომისიის აპარატის დებულებას, კომისიის თავმჯდომარესთან შეთანხმებით და უმაღლესი საბჭოს აპარატის უფროსის წარდგინებით ბრძანებით ამტკიცებს უმაღლესი საბჭოს თავმჯდომარე.
2. კომისიის აპარატის დებულებაში ცვლილებების შეტანა ხდება კომისიის თავმჯდომარესთან შეთანხმებით და უმაღლესი საბჭოს აპარატის უფროსის წარდგინებით უმაღლესი საბჭოს თავმჯდომარის ბრძანებით.
3. კომისიის აპარატის რეორგანიზაცია ხორციელდება საქართველოს კანონმდებლობით დადგენილი წესით.